

**VENDIM**  
**Nr. 395, datë 29.4.2015**

**PËR MIRATIMIN E PROGRAMIT KOMBËTAR TË PRAKTIKAVE TË PUNËS NË  
ADMINISTRATËN SHTETËRORE DHE INSTITUCIONET E TJERA PUBLIKE<sup>1</sup>**

*(Ndryshuar me VKM nr.835, datë 23.11.2016)*

*(I përditësuar)*

Në mbështetje të pikës 4, të nenit 100, të Kushtetutës, me propozimin e ministrit të Mirëqenies Sociale dhe Rinisë, Këshilli i Ministrave

**VENDOSI:**

1. Miratimin e Programit Kombëtar të Praktikave të Punës në administratën shtetërore, në nivel qendror dhe vendor, dhe institucionet e tjera publike për profesionistë të rinj (në vijim referuar si “Programi Kombëtar i Praktikave të Punës”).

2. Programi Kombëtar i Praktikave të Punës synon të përfshijë pjesëmarrësit në një eksperiencë pune të integruar e në ndërveprim me profesionistë karriere në administratën publike, me qëllim përfitimin e një përvoje kualifikuese që ndikon në zhvillimin e aftësive të tyre profesionale e të shprehive të tyre praktike në njohje me sistemin administrativ publik.

3. Aplikantët, të cilët do të bëhen pjesë e këtij programi, duhet të jenë të rinj nga mosha 21 deri në 26 vjeç, të diplomuar në programet e studimit të ciklit të parë “Bachelor”.

4. Programi Kombëtar i Praktikave të Punës zgjat nga 3 muaj deri në 12 muaj, sipas thirrjeve. Përfshirja në këtë program është pa pagesë. Periudha e praktikës së zhvilluar do të njihet si përvojë pune gjatë procedurave të rekrutimit në institucionet e administratës publike.

5. Programi Kombëtar i Praktikave të Punës do të realizohet nga Ministria e Mirëqenies Sociale dhe Rinisë, e cila do të mbështetet nga institucionet e administratës shtetërore dhe institucione të tjera publike që ofrojnë gatishmëri për pranimin e aplikantëve. Ministria e Mirëqenies Sociale dhe Rinisë do të kryejë rolin e sekretariatit teknik të programit për koordinimin ndërinstitutional.

6. *Programi Kombëtar i Praktikave të Punës do të realizohet sipas planveprimt dhe metodologjisë së miratuar nga ministri i Mirëqenies Sociale dhe Rinisë, që përcakton shpalljen për thirrjet e radhës, afatin për aplikim, dokumentet për aplikim dhe mënyrën e vlerësimit.*

7. Administrata shtetërore dhe institucionet e tjera publike që mbështetin këtë program duhet të paraqesin numrin e praktikantëve dhe profilin e tyre. Të gjitha institucionet pjesëmarrëse në këtë program kanë për detyrë të përcaktojnë 1 person kontakti i cili është përgjegjës për:

a) *Dorëzimin pranë Ministrisë së Mirëqenies Sociale dhe Rinisë e Departamentit të Administratës Publike të numrit të praktikantëve për çdo thirrje;*

b) ofrimin e kushteve të nevojshme të punës;

c) përcaktimin e një mbikëqyrësi për çdo praktikant;

ç) komunikimin me Ministrinë e Mirëqenies Sociale dhe Rinisë.

d) *dërgon pranë Departamentit të Administratës Publike emrat e praktikantëve që rezultojnë fitues të procesit të përzgjedhjes për çdo thirrje, brenda 5 (pesë) ditëve pune nga data e përfundimit të këtij procesi.*

Në përfundim të programit, institucioni i lëshon praktikantit vërtetimin për kryerjen e praktikës.

8. Mbikëqyrësi në administratën shtetërore duhet të jetë i konfirmuar me statusin e nëpunësit civil. Në institucionet e tjera publike ai duhet të jetë një punonjës me eksperiencë në punën që kryen.

9. Mbikëqyrësi ka përgjegjësinë:

---

<sup>1</sup> VKM nr.395, datë 29.4.2015 është botuar në Fletoren Zyrtare nr.80/2015.  
VKM nr.835, datë 23.11.2016 është botuar në Fletoren Zyrtare nr.239/2016.

- a) të përcaktojë detyrat dhe angazhimet për praktikantin;
- b) të supervizojë, të këshillojë dhe të udhëzojë gjatë realizimit të detyrave të dhëna;
- c) të vlerësojë performancën e praktikantit gjatë praktikës;
- ç) të përpilojë vërtetimin në të cilin përcaktohen kryerja e praktikës, njësia pranë së cilës është realizuar praktika dhe përshkrimi i detyrave;
- d) të përgatitë vlerësimin përfundimtar për praktikantin;
- dh) të gjykojë për arsyet e përfundimit të programit nga ana e praktikantit në rast shkeljeje të marrëveshjes midis institucionit dhe praktikantit.

10. Thirja e parë e Programit Kombëtar të Praktikave të Punës do të kryhet brenda muajit qershor 2015.

11. Institucionet e administratës shtetërore qendrore, pjesëmarrëse në program, do të punësojnë me kontratë të përkohshme pune 200 praktikantë, të përzgjedhur nga thirrja e parë dhe që kanë kryer praktikën e punës në atë institucion në kuadër të kësaj thirrjeje. Përzgjedhja e praktikantëve kryhet nga secili institucion pjesëmarrës mbi bazën e vlerësimit të performancës, mesatares dhe titullit të studimit që përkon me profilin e pozicionit të punës. Numri i praktikantëve që do të mund të punësohen në thirrjet në vazhdim do të përcaktohet rast pas rasti.

*11/1. Ministria e Mirëqenies Sociale dhe Rinisë të administrojë procesin e punësimit të praktikantëve në thirrjet e radhës, duke përcaktuar numrin e praktikantëve që do të punësohen me kontratë të përkohshme, bazuar në numrin e praktikantëve që do të kryejnë me sukses programin e praktikës, si dhe në kërkesat e institucioneve të administratës shtetërore për punësimin e përkohshëm të tyre.*

*11/2. Ministria e Mirëqenies Sociale dhe Rinisë i propozon Ministrisë së Financave numrin e praktikantëve që do të punësohen në kuadër të Programit Kombëtar të Praktikave të Punës, me kontratë të përkohshme deri në një vit, për çdo institucion të administratës shtetërore.*

12. Në përfundim të çdo programi, Ministria e Mirëqenies Sociale dhe Rinisë i raporton Departamentit të Administratës Publike për çdo praktikant për periudhën profesionale si dhe institucionit, pranë të cilit është kryer kjo praktikë. Këto të dhëna regjistrohen nga Departamenti i Administratës Publike në një bazë të posaçme të dhënash.

13. *Fondet e nevojshme financiare për zbatimin e pikave 11/1 dhe 11/2, të këtij vendimi, të përballohen nga buxheti i miratuar për ministrinë apo institucionin buxhetor, për shpenzimet për personelin, për vitin përkatës.*

14. Ngarkohen Ministria e Mirëqenies Sociale dhe Rinisë, Ministria e Financave dhe të gjitha institucionet e administratës publike, të përfshira në program, për zbatimin e këtij vendimi.

Ky vendim hyn në fuqi pas botimit në Fletoren Zyrtare.

**KRYEMINISTRI**  
**Edi Rama**